

N an che fenesc e n an che scomenza

Na veièda ai calandères de la scolina de Ciampedel, de Gladia Debertol e de Floz, e del boletin del Zircol de la jent de età de Poza

L'é gran, rich e da color l calandèr del 2011 che à dat fora chest an i bec de la scolina de Ciampedel. Rich de retrac che testimoniea i momenc più bie e più gustégol passé te scolina, su la neif, te paisc, sa mont, opura i bie desseignes e lurieres che i à fat ensema a sia maestres.

Ogne meis l'é compagnà da n pensier scrit per fascian, adatà a la sajón, a la festes o a n moment particulèr. De jené l'é i bec che matea su la neif, de firé ciuta fora la mèscres, de mèrz l'é i desseignes che i à fat sun nosc ambient canche te scolina l'é jìt a i troèr doi sozi del Cai Sat, de oril vegn Pèsca, mé l'é l meis dedicà a la Madona, de jugn l'é i bec grignolenc con sia families jun Ischia, de messèl na bela sfridèda a la mans, de aost l jech del domino, de setember na bela raida sa mont, de otober n pensier a la scola, de november l'uton con si bie colores e l'éjìt del projet

“educchèr ai deric umans” e de dezember la festes del Nadèl.

Tassie che recorda l'atività portèda inant te scolina via per dut l'an 2010, zenza desmentìer la reijes culturèles e identitères de chisc pìcoi. Segur n belot calandèr da tachèr sù te cèsa da fech o te stua, che reste desche recort di egn passé e desche envit a se tor dant l davegnir, con la medema gaissa e l medemo entusiasim, tant che chi bec feruscoi de la scolina de Ciampedel.

Anter i calandères n'é un che an dò an l'à semper più suzess. L'é chel de la dotora Gladia Debertol da Cianacei e defat ence chest an no l podea mencèr. La Luna no lascia de encantèr. Da canche l'om l'é su la Tera l se à semper fat vidèr da la Luna. Da na generazion a l'autra chisc preziosc insegnamenc i é passé da nesc giaves, genitores e anchecondi, enscin a nos. Gladia Debertol vidèda da l'amor e la

pascion envers chesta disciplina, da n trat de egn la se dèsc da fèr per meter ensema n calandèr che l'é tanche n pìcol liber ajache ite de sé l'à consees e informazions sun n muie de aspec de la vita de duc i dis e per ogne sort de lurier. Vegn dat consees su la cura de sé enstesc, su la cura del vidor, de l'ort e ence sul legnam. Ajache Gladia la se cruzia ence de cromoterapia sul calandèr se troa ence consees en cont de chest. Ampò “La Luna te tol per man...” l'é n muie de più. Per duc l calandèr l'é a la leta te boteiga “Idealregalo”, te piaz de Sèn Florian de Cianacei e ence te senta de l'Union di Ladins a Sèn Jan.



Più pìcol e più scempie l'é enzeve l calandèr che ence per l'an 2011 à metù dant Fiorenzo Secchi Floz da Ciampedel che chest'outa l'à publicà dut veia chèrtes de posta che moscia l refuge Dialer sun Mont de Sousc, si mudamenc tel cors di egn, n refuge che – descheche à dit Floz

- aldidanché no l'é più. La pascion de Floz ne mena ence via per l 2011 a se n fèr marevea de cotant che l'é mudà te chisc egn nosc ambient. Chi che volessa aer l calandèr de Floz pel ge l domanèr a el enstes.

L'an del Zircol de la Jent de età

Ence l 2010 l'é sgolà e descheche se fèsc ogne fin de an, ence l Zircol de la Jent de età de Poza à fat n bilanz de chel che l'é stat, travers sie gustégol boletin, l numer 15, rencurà desche zenza da Maria Teresa Fanton Crepaz col didament de sie staff. “Se tende semper a recordar i momenc più dolorusc o mesties, le magagne e i cruzies – scif la redazion sun la pruma piata. Cerion donca de recordar ence i momenc più bie, le felizità, le grazie che fosc zenza se n ascorjer o che ne somea zenza emportanza, l Segnoreddie ne conzede. Se ge

pissade ben le é dassen n muie!” E belapontin sun chest numer del boletin se pel veder cotant che se gode nesc veiac al Zircol de la Jent de età con festes, polentades, tomboles, scomenzadives desvalives ma soraldut de duta la raides che i se fèsc via per l'an. Te chesta edizion mencia la piates dedichèdes a la poejia e chela coi sfoes che scif del Zircol ajache i à volù ge dèr più lèrga a la barseletes ajache sion sot Carnascèr. E dapò, se sà, grignèr fèsc bon sanch. E na piata ge vegn dedichèda chest'outa ence ai amisc e a la amiches de lengaz todesch. No mencia l cianton de la mùsega, de la rezeta, de l'ejam fascian e l retrat tout fora da na crigna. Dantfora la relazion del president Luciano Crepaz col bilanz de l'an 2010. E amò de bie retrac da color... n auter boletin da no se lascèr perder! (mci) Con foto: La soracuerta del boletin del Zircol de la Jent de età de Poza.



La soracuerta di calandères de la Scolina de Ciampedel, de Gladia Debertol e de Floz, e chela del Boletin del Zircol de Poza.